

# **Vischnaunca Andiaast**



## **Reglament davart il lungatg ufficial communal**

# ***Reglament dalla vischnaunca d' Andiaast davart il lungatg uffical communal***

## ***Art. 1 Finamira***

Il romontsch sursilvan ei il lungatg uffical dalla vischnaunca.

Quest uorden regla siu diever. El ha la finamira da garantir il diever dil romontsch sursilvan sco lungatg uffical da vischnaunca els divers secturs dall'administraziun, dalla scola e dalla preschientscha publica e vul cheutras gidar a mantener quel.

## ***Art. 2 Denominaziun***

La denominaziun en quest reglament vala per persunas, funcziuns e mistregns dad omisduas schlatteinas.

## ***Art. 3 Decrets legislativs***

Ils decrets legislativs vegnan redigi en romontsch, en particular:

- a) la constituziun communal
- b) las leschas, ils uordens ed ils reglaments da character general abstract sco era ils decrets e las publicaziuns ufficalas che sedrezzan alla publicitad.

Sche translaziuns en auters lungatgs existan, vala la versiun romontscha sco ufficala.

## ***Art. 4 Radunonzas e tschentadas***

Las radunonzas e tschentadas dils organs communal vegnan menadas e protocolladas en romontsch.

Sin damondas e propostas en auters lungatgs nazionals vegn per regla priu posiziun en romontsch.

## ***Art. 5 Administraziun***

L'administraziun succeda da principi en romontsch, en particular:

- a) la correspondenza, decisiuns e disposiziuns communalas che sedrezzan a persunas domiciliadas en vischnaunca
- b) circularas e communicaziuns che sedrezzan a l'entira populaziun domiciliada
- c) per regla era correspondenzas ed inoltraziuns allas autoritads cantunalas e federalas ed a lur uffecis
- d) publicaziuns ufficalas

## ***Art. 6 Scolaziun***

La vischnaunca meina la scoletta e las scolas tenor legislaziun cantunala per scolettas e scolas romontschas.

La vischnaunca sustegn activitads che promovon l'integraziun linguistica dils habitonts ella cumunionza.

## ***Art. 7 Inscriziuns***

Inscriziuns drizzadas alla publicitad e reclamas stablas che pretendan ina lubientscha communalan ston esser romontschas.

Las vischnauncas san lubir excepziunalmein translaziuns. Lubidas ein era terminologias internaziunals che selain buca translatar.

Inscriziuns existentas buca romontschas san restar vinavon. La vischnaunca s'engascha denton per che quellas vegnien adattadas el senn da quest artechel.

## ***Art. 8 Inoltraziuns***

Inoltraziuns da personas privatas u giuridicas domiciliadas en vischnaunca han da principi da succeder en romontsch.

## ***Art. 9 Contribuziuns***

En connex cun contribuziuns communalas per arranschaments publics animescha la vischnaunca da duvra il romontsch.

## ***Art. 10 Execuziun e coordinaziun***

L'istanza cumpetenta e responsabla per l'execuziun da quest reglament ei la suprastanza communalana

Quella collavura cun las vischnauncas dil cumin sco era cun las autras vischnauncas per realisar ils postulats da quei reglament.

## ***Art. 11 Entrada en vigur***

Quest reglament va en vigur cun sia approvaziun entras la radunonza communalana.

Quest reglament ei vegnius presentaus ed approbaus dalla radunonza communalana dils 31-10-1997.

Il president communal:

L'actuara communalana:

\_\_\_\_\_

\_\_\_\_\_